

## Pea via la rassegna de teater te Fascia

N spettacol mingol particulèr de "teater musical" aur la lingia de comedies endrezèdes dal Comun general con i gropes de duta la val

"Storia del sudà" l'è l'itol de l'opera che doman, sabeda ai 27 de otober, da les 20.30 tel Chino de Cianacei averc la rassegna de teater endrezèda dal Comun General de Fascia. Se trata de na raprezentazion piutost fora de anter, respet al teater populèr tradizionèl che caraterisea chesta rassegna: n "teater musical" modern, che va dò la strèda orida da l'opera lirica e dal melodram, ma olache l test no é ciantà, ma dit sù aldò del ritm de tòc de mùsega che per sia pèrt conta na storia. L gran componist rus Igor Stravinskij à scrit l'Histoire du soldat

tel 1918, sul test franzous de Charles-Ferdinand Ramuz adatà lediamenter da na contia de la tradizion populèra russa: n Sudà, veteran di ciampes de batalia, scontra l Malan che ge propon de baratèr sia ènema con la richeza, nia auter che l'orendo pat col malan che se cognosc da tempes veiores. Anter i doi se svelupea n gustegol contrast, che vegn compagnà da na "ousc che conta" e che vegn serà sù tinultima da l'intervent de na belota prinzessa (interpretèda da la balarina Ester Zulian) per n finèl che nesciugn se spetassa.

L test, traslatà per ladin e contà da Vigile Iori, e interpretà a na vida straordenèra dai joegn atores Francesco Gabrielli e Ismael Pellegrin, desmostra amò n'outa la gran potenzialità de nosc idiom desche lengaz de cultura e lengaz de teater, percacent tel secodir l ritm sostegnù, vèlch outa desnechetà, de la contia musicala. N'esperienza nasciuda te la Scola ladina de Fascia de gra a la proponeta de l'Ensemble Windkraft de Busan, ret dal maester Kaspar De Roo, na formazion musicala de livel internazionèl ativa da egn te noscia



I protagonisc de la raprezentazion "Storia del sudà".

region. Dò la "pruma", outa ai studenc de la scola autes del 2017, Fascia tol dant amò n'outa chisc musizisc ezelenc, per n spettacol de aut valor artistich.

La rassegna de teater jirà inant en vender ai 9 de november da les 20.30 te teater de l'Oratorie de Poza e en domenìa ai 11 de november da les

15.30 a La Gran Ciasa de Soraga con n spettacol dut da grignèr del grop di jocolieres de "INOUT TEAnTER" che portarà dant "L circo di talenc" e dapò ogne fin de setemèna enscin ai 16 de dezember con la comedia de n auter grop de teater fascian (dut l program é su la piata Facebook del Comun general de Fascia).